

Auditues të KLSH-së ndjekin konferencën “Përmirësimi i efikasitetit dhe transparencës së prokurimit publik”

Lisbonë, 3 shkurt 2025

Më datë 3 shkurt 2025 u zhvillua në Lisbonë, konferenca përmbyllëse e projektit “Përmirësimi i efikasitetit dhe transparencës së prokurimit publik” organizuar nga Gjykata Portugeze e Audituesve dhe Organizata për Bashkëpunim dhe Zhvillim Ekonomik (OECD), me temën: “Forcimi i Mbikëqyrjes së Gjykatës së Audituesve për Prokurim Publik Efektiv në Portugali”.

Në punimet e konferencës u prezantuan konkluzionet e projektit të përbashkët të Gjykatës së Audituesve me OECD dhe Komisionin Evropian (DG Reform) për përdorimin e Inteligjencës Artificiale (AI) në prokurimet publike, model ky që i mundëson Gjykatës të identifikojë dhe parandalojë parregullsitë dhe risqet e prokurimit publik në kohë reale.

Në fakt, përdorimi i AI do të bëjë të mundur përpunimin e vëllimit masiv të të dhënave në kohë reale për kontratat publike të mbajtura nga Gjykata dhe organet e tjera të administratës publike, duke rritur efikasitetin, efektivitetin dhe transparencën e Gjykatës në prokurimin publik duke forcuar cilësinë, rëndësinë dhe efektivitetin e misionit të kontrollit të jashtëm.



Në konferencë morën pjesë përfaqësues nga autoritetet kombëtare dhe institucionet ndërkombëtare, përkatësisht Institucionet Supreme të Auditimit dhe agjencitë e lidhura me prokurimin publik. Me ftesë të homologëve kjo konferencë u ndoq në formatin online edhe nga auditues të KLSH-së.

Në pjesën e parë të konferencës u diskutua tema: “Integrimi i AI dhe mësimi i makinerisë në auditim: Mësimet, progresi dhe rruga përpara në Portugali”. Në temën e prezantuar u pasqyrua përmbledhja e rezultateve kryesore të zhvilluara në projektin që Tribunal de Contas (TdC), institucioni suprem kombëtar portugez i auditimit ka zhvilluar me mbështetjen e OECD, për të përmirësuar efikasitetin dhe transparencën e prokurimit publik me fokus në forcimin e kuadrit të kontrollit. Si pjesë e mandatit të saj, TdC kryen çdo vit mijëra detyra kontrolli (kontroll apriori, auditime në kohë reale dhe auditime posteriori) të aktivitetit të prokurimit publik, një proces që kërkon shumë kohë dhe shpenzime të konsiderueshme të burimeve njerëzore dhe financiare. Projekti kërkoi të përmirësonte kapacitetin e TdC për të vlerësuar risqet dhe parregullsitë në prokurimet publike përmes rritjes së përdorimit të inteligjencës artificiale.



Në pjesën e dytë të konferencës u diskutua tema: “Transformimi dixhital dhe vlerësimet e rrezikut të bazuara nga të dhënat për të forcuar mbikëqyrjen e auditorëve në prokurimin publik”. Në temën e prezantuar u diskutua se si zhvendosja strategjike drejt një qasjeje të bazuar në risk dhe të drejtuar nga të dhënat për shënjestrimin e burimeve të auditimit mund të ndihmojë në forcimin e kuadrit të kontrollit për të rritur efikasitetin dhe transparencën e shpenzimeve të prokurimit publik.

Vitet e fundit, SAI-t dhe organet e tjera mbikëqyrëse kanë eksploruar gjithnjë e më shumë përdorimin e të dhënave për të rritur aktivitetet e tyre mbikëqyrëse. Institucionet Supreme të Auditimit (SAI) janë aktorët kryesorë në sistemin e prokurimit publik, duke e mbrojtur atë nga kërcënimet dhe duke siguruar efikasitetin dhe integritetin e tij. Kjo është veçanërisht e rëndësishme duke pasur parasysh se prokurimi publik është një shtyllë kyçe e ofrimit të shërbimeve publike, duke përfaqësuar mesatarisht rreth 12% të PBB-së në vendet e OECD-së. Kërcënimet dhe risqet që prekin funksionin e prokurimit publik mund të kenë pasoja të rëndësishme në cilësinë dhe sasinë e shërbimeve publike që qeveritë mund të ofrojnë. Në sferën e prokurimit publik këtë e ka mundësuar transformimi dixhital i sistemit të prokurimit publik. Ky transformim shkon përtej sistemeve tradicionale të prokurimit elektronik dhe adopton një perspektivë më holistike, duke përfshirë integrimin më të madh me sistemet e menaxhimit financiar publik dhe përafrimin me strategjitë dixhitale të qeverisë.